

100 dis dla Rë zivica per ladin

L nteres ie tlo y la cumpèida de vijites crësc: chësc ie l prim bilanz dla Rë zivica per ladin do 100 dis che la ie online. La popolazion ladina a scumencià a se usé dl servisc de nutizies, di servijes dl'aministrazion publica y dla banches dac. Drët vijitedes ie nce la previjions meteo tla rujeneda ladina.

A i 5 de dezèmber fovel unì giauri la Rë zivica dla Provinzia de Bulsan nce tla rujeneda ladina. 100 dis do iel bele unì cumpedà 8.638 vijites. Tenian cont che la jënt fova usada a ti cialé ala medema plates tl'otra rujenedes ie i respunsabili dla Provinzia cuntënc de chësc prim bilanz. "Sun la rë zivica vëniel pità servijes, nformazion y nutizies te nosta rujeneda, sën vala de se usé a adurvé mo de plu chësta puscibilità tres internet" mët a cuer l assessëur ladin Florian Mussner.

Aldò dla statistiches iel nchinamò unì cialà l plu svënz ala plata

prinzipela www.provincia.bz.it, ai servijes per categories y ala nutizies d'atualità. Truep nteres iel nce unì mustrà per i cuntac de istituzions y ufizies, formulareres per fé dumandes y al calënder dla manifestazions.

La Rë zivica dla Provinzia ie unida anjenieda tla rujeneda ladina per arjonjer doi fins prinzipiei: chël de pité nformazion ala popolazion ladina te si rujeneda y dal'otra pert de

posizioné la mendranza ladina sun un di portai internet plu vijitei dl Südtirol. Davia che l ladin ie na rujeneda de mendranza ne posen nia se aspité de grandiscima cumpèides de vijitadëures. Ma de mpurtanza, nsci l assessëur ladin, ie che la rujeneda ladina vën te chësc cajo metuda ala pèr cun l'otra rujenedes, nce sce nosta mendranza fej me ora na pitla pert dla popolazion provinziela.

N bon scumenciamënt à nce abù l servisc de nformazion meteo tla rujeneda ladina. La plata www.provincia.bz.it/meteo-ladin ie ntan i prim 100 dis unida vijiteda 6.100 iedesc. Truep nteres iel stat per la previjions meteo per dut l raion dl Südtirol ma nce per la previjions ti raions. Drët bën ie nce unì nuzà l servisc de radar dala plueia, dla camereres web y di valores dala singula stazions dal tëmp. De chëstes ne n iel nce una te Sëlva, a San Martin de Tor, sun Piz La Ila y sun Piz Pisciadù. Tres la camereres web posen datter auter nce udëi i raions dl Jëuf de Freja y dla Mont de Sëuc. ■

L'adresses inetnet

www.provincia.bz.it
www.provincia.bz.it/m/la (verscion per l telefonn)
www.provincia.bz.it/meteo-ladin

CD de cianties per scola

Per cianté te scola possa maestres y maestri sëuraprò al liber »Can-



zoni, canzoncine e filastrocche« sën nce se jué de doi CD nueves. La cianties ie unides anjeniedes ca dal maester Paul Senoner che les à nce nseniedes ite a Elena Cortoni, Alex Designori y Giacomo Talarico dl Cor di Mutons de Sëlva. L Servisc Inuvazion y Cunsulënza per la scoles ladines à realisà chësc projet ajache l cianté à na gran mpurtanza tl nseniamënt ti prim ani de scola.

La CD dopla ie mpartida do tematiches via per l ann de scola, do la sajons y la festes via per l ann. L ie unì cris ora cianties religëuses, de fantajia, da rì, sun tieres y cianties de cumpania. ■

Internet aslune ti luesc ladins

Tl program dla nfastrutures per la rè de culegamènc internet a slune tl 2013 iel per i luesc ladins udù ndant nvestizions per belau na milion de euro.

La Provinzia à udù dant de purté l culegamènt de internet aslune tres fibra otica mo ntan chësc ann nchin te uni chemun. La spartizion dala zentreles ala singula cëses ie pona tla mans dl chemun de cum-petènza. “L program dla nfastrutures per l internet aslune che on dat pro te Jonta provinziela vëija nce dant de plu lëures acioche la firmes y la families ti luesc ladines posse se nuzé miec dla rè” spiega l assessëur Florian Mussner che se cruzia di culegamènc internet aslunge. Danter i lëures bele nviei via iel la roles danter Longega y Al Plan, y la roles da Longega nchin a La Ila. Per chisc doi pec iel udù dant n custimènt de 194.000 euro. La proietazion dl cu-



Tl program dla Provinzia per i culegamènc internet aslune 2013 iel nvestizions de belau na milion de euro tla valedes ladines.

legamènt danter Piculin y San Martin de Tor ie tl lëur de unì stluta ju. Sun l program 2013 iel per chësc toch udù dant n custimènt de 120.000 euro. Per mèter ju la roles te Gherdëina, da Ciastel a Urtijëi y da Urtijëi nchin te Sëlva iesen tl lëur de stlù ju la proietazion. Per chisc doi proiec iel per l 2013 udù dant na nvestizion de 400.000 euro. Per vel culegamènc de internet aslune iel unì fat cunvenziions cun la cumuniteies de racion. N ejèmpl pieta tlo la streda dala

rodes a Runcadic ulache l ie nce unì metù la roles per pudëi pona tré tres i cabli de fibra otica.

Danter i proiec che ie unic tëuc su da neuf tl program di lëures per la valedes ladines iel l pez da Pidrô a La Val y l tré tres dla fibra otica da Urtijëi nchin te Sëlva. ■

info

De plu sun l internet aslune sun www.provinzia.bz.it/breitband

Cuntac danter Fedom y Bulsan

Responsabli dl Istitut culturel Ladin de Fedom, Luca Agostini y Moreno Kerer se à ancuntà a Bulsan cun l assessëur ladin Florian Mussner per miuré i cuntac

danter Fedom y Bulsan, ma nce per traté formes de sustèni y culaburazion.

Tl'ancunteda ai 22 de fauré danter l presidènt y diretëur dl Istitut culturel Cësa de Jan cun l assessëur provinziel Mussner se ala danta-prima tratà de puscibleteies de culaburazion y sustèni. “Ulon ruvé a na culaburazion tla realizazion di programs” à dit Florian Mussner do l'ancunteda.

Acioche l posse unì laurà per mantèni y fë viver la cultura ladina sëuramont iel cuncretamènter nce unì ruvenà de puscibleteies de finanzia-mènc da pert de Bulsan. Mussner ie te chësta ucasion nia me persona de referimènt per l Assessorat provinziel ladin, ma l à nce ruvenà te si funzion da vizepresidènt dla Region Trentino - Südtirol. ■

Cin valedes ladines sun dlacia

Nturnoi de hockey interladin à dat Nucajion a sculeies dla cin valedes ladines ntëur l Sela de se ancunté y de mparé a se cunëscer miec.

“L sport ne ie nia me cumpetizion, l sport fej viver mumènc de grupa y fej nascer cuntac” sorisseea l assessëur ladin Florian Mussner n referimènt ala quarta edizion dl turnoi de hockey per sculeies dla mesanes ladines. Tl turnoi da chëst ann ie unì jugà a Alie (Alleghe) te Fedom y ie unì venciù dai sculeies de Fascia. De mpurtanza ne ie nia tan chiche vènc, ma aldò dl assessëur ladin, ie i cuntac danter i sculeies y nseniand dla valedes ladines l gran valor de chësta scumenciadiva. ■



foto USP/as

Florian Mussner cun Moreno Kerer y Luca Agostini dl Istitut culturel Cësa de Jan